



## Comunicado di Prensa

8 di februari 2023

### **Cft: "E prioridad maximo ta e cambio pa logra surplus plurianual"**

**Willemstad – Corsou tin un bon punto di salida pa realisa surplus presupuestario plurianual, esaki ta door di, entre otro, e resultadonan importante di e proyecto pa aumenta entrada di impuesto. Despues di hopi aña di deficit presupuestario, Corsou mester duna prioridad absoluto na cambio pa alcanza surplus plurianual. Colegio di supervision financiero di Corsou y Sint Maarten (Cft) a urgi Gobierno di Corsou esey den e combersacionnan reciente. Corsou ta enfrenta e tarea importante di reduci e debe publico na un nivel prudente, mientras cu e riesgonan y e incertidumbrenan ta sigui mes halto. Esaki ta conta specialmente pa cuida di salud y seguridad social. Reforma structural y inversion pa stimula crecimiento, combina cu maneho stricto di presupuesto plurianual, ta esencial pa pone finansa publico na ordo.**

Na principio economia di Corsou a recupera rapidamente di e efectonan di e crisis di pandemia. Despues di e contraccion economico di 18,4 por ciento na 2020, economia real di Corsou a crece cu 4,2 por ciento na 2021 y cu 5,9 por ciento na 2022, segun e calculacionnan di Banco Central di Corsou y Sint Maarten (CBCS). Na 2022 e producto interno bruto nominal a bolbe na su nivel di prome cu e pandemia. Pa e aña aki CBCS ta spera un crecimiento economico real di 2,7 por ciento, mientras cu ta premira cu e inflacion lo ta di 4,5 por ciento.

Un periodo di añanan largo cu deficit presupuestario y crecimiento di e debe publico a haci cu finansa publico di Corsou a empeora hopi. E debe publico di Corsou actualmente ta monta na ANG 4.300 miyon, pues, 79 por ciento di e producto interno bruto. Corsou ta enfrenta e tarea importante di reduci e debe publico na un nivel prudente, di cubri e riesgonan paden y pafo di e presupuesto, y di pone sostenibilidad di finansa publico na ordo riba un base plurianual. Por lo tanto, realizacion di surplus presupuestario for di 2023 mester haya prioridad absoluto.

#### **Presupuesto di 2023**

Fin di aña pasa Parlamento di Corsou a aproba e presupuesto di 2023. Corsou ta presenta un presupuesto balansa den 2023 y 2024, sigui pa surplus presupuestario limita den 2025 y 2026. Cft a urgi Corsou pa realisa surplus presupuestario na 2023 caba y uza e surplusnan ey pa paga e debe publico parcialmente. Esey no ta un tarea imposibel, ya cu Corsou ta logrando bon resultado desde 2021 cu e proyecto di aumento di cumplimiento fiscal y optimalisacion di implementacion di e sistema fiscal. Combina cu recorte di gasto di Gobierno y un maneho presupuestario stricto, Corsou por logra e cambio pa yega na un surplus presupuestario ya den 2023.

#### **Cuida di salud y seguridad social**

Pa frena e crecimiento di gasto den seguridad social y cuida di salud, reforma ta necesario. Cft tin basta tempo ta señala incumplimento di e medidanan anuncia na 2021 pa e fondo fluctuante, y e riesgonan di esey pa e presupuesto di e pais. Corsou ta paga un contribucion anual di ANG 306 miyon na e fondonan social y ta obliga tambe pa compensa deficit di e fondo fluctuante. Cft a enfatisa cu Corsou no solamente mester tuma medida compensatorio na plaso corto pa evita deficit den e fondo fluctuante, sino tambe mester implementa reforma structuralmente pa evita deficit na plaso largo.



Cft tambe a expresa su preocupacion explicito pa e situacion financiero precario di Curaçao Medical Center y e tardamento di accion concreto. Cft a yega di pidi Corsou caba pa tuma medida di prevision pa esaki den e presupuesto.

### **Reforma y inversion**

Reforma structural, manera inclui den e Pakete di medida (Landspakket), y inversion pa stimula crecemento ta fundamental pa fortalece e potencial di crecemento di Corsou y aumenta e resiliencia di economia. Cft a señala e nivel abou di inversion publico y a anima Corsou pa inclui plan di inversion specifico den e presupuesto, por ehempel riba tereno di infraestructura fisico, y ehecuta nan cu e diligencia debido. Corsou mester probecha na un forma maximo di e oportunidadnan cu e Pakete di medida (Landspakket) ta brinda pa implementa reforma pa fortalece estructura. Esaki lo fortalece e posicion inicial y sostenibilidad di finansa publico.

Desde dia 1e. di februari 2023, Señora Lidewijde Ongering ta nombra como presidente di Colegio di supervision financiero di Corsou y Sint Maarten (Cft), Colegio di supervision financiero di Aruba (CAft) y Colegio di supervision financiero di Boneiro, Saba y Sint Eustatius (Cft). Cft, den su constelacion nobo, a bishita Corsou di dia 6 pa dia 8 di februari 2023 y a hiba combersacion cu Gobernador, Minister di Finansa, Minister di Salud, Medio Ambiente y Naturalesa, Consejo di Minister y Comision di Finansa di Parlamento. Cft a combersa tambe cu gerencia di Banco di Seguro Social (SVb), Inspeccion di Salud Publico, directiva di Curaçao Medical Center y e intendente (kwartiermaker) di e Grupo Directivo di Saneamento di e entidadnan di CMC (Regiegroep Sanering CMC-entiteiten).

[Fin di e Comunicado di Prensa]

**Fotografo:**

Nathan Roosberg

**Texto na potret:**

Reforma structural ta di gran importancia pa Corsou.

**Nota pa redaccion – no pa publicacion**

Persona di contacto na Cft:

Secretariado di Colegio di supervision financiero  
Telefon +5999 461-9081 / +5999 461-9082 / +5999 461-9084  
Email [info@cft.cw](mailto:info@cft.cw)  
Website [www.cft.cw](http://www.cft.cw)

Persona di contacto cu Prensa:

Jefka Alberto  
Telefoon +5999 512-6861